

Informacija o održanom trećem Kongresu o katastru u BiH

04.12.2015 23:53



U Mostaru je od 2. do 4. decembra 2015. godine, u organizaciji Geodetskog društva Herceg-Bosne, održan treći Kongres o katastru u BiH. Kongres je održan pod visokim pokroviteljstvom predsjedavajućeg Predsjedništva BiH dr. Dragana Čovića i na njemu je učestvovalo oko 300 učesnika iz BiH, regionala, ali i iz zemalja Evropske unije. Program kongresa se sastojao od šest sesija, a svoje radove je prezentiralo 26 prezentatora. Predsjednik Geodetskog društva Adelko Krmek je u uvodnom dijelu uputio pozdravne riječi dobrodošlice svim učesnicima i gostima kongresa, upoznao prisutne s aktivnostima Geodetskog društva u prigodi obilježavanja dvadesete obljetnice djelovanja društva, te su zaslužnim članovima dodijeljene zahvalnice za doprinos u radu društva.

Pozdravne riječi su također uputili i Marie Bengstron, izaslanica ambasadora Kraljevine Švedske,

Nevenko Herceg, premijer Vlade Hercegovačko-neretvanskog kantona, Ljubo Bešlić, gradonačelnik grada Mostara, i Željko Obradović, direktor Federalne uprave za geodetske i imovinsko-pravne poslove, koja je i glavni sponzor održavanja trećeg Kongresa o katastru u BiH.

Na koncu uvodnog dijela Tugomir Čuljak, izaslanik predsjedavajućeg Predsjedništva BiH dr. Dragana Čovića, je uz prigodne pozdravne riječi svečano otvorio rad trećeg Kongresa o katastru u BiH.

Učesnici kongresa su imali prigodu čuti trenutne aktivnosti Federalne uprave za geodetske i imovinsko-pravne poslove, stanje realizacije projekata, kao i viziju budućih aktivnosti u sektoru zemljije administracije.

Poseban naglasak je stavljen na infrastrukturu prostornih podataka i trenutno stanje aktivnosti u ovom sektoru kako u BiH, tako i u regionu, posebno na preuzimanje pozitivnih evropskih iskustava u kreiranju, razmjeni i distribuciji prostornih podataka.

Zanimljiva su bila predavanja i u dijelu koji se odnosio na upis nekretnina i prava na nekretninama te aktivnosti na polju geodetske osnove.

Tokom kongresa prisutni su se upoznali i s realizacijom CILAP i IMPULS projekata, koji u znatnoj mjeri pomažu domaćim agencijama u rješavanju pitanja od vitalnog značaja za geodetski i katastarski sektor u BiH, ali i regionu.

Na kraju zasjedanja konstatirano je da sektor zemljije administracije treba biti prepoznat kao vladin prioritet, a sigurni i usaglašeni podaci o nekretninama osnovica i uslov pripreme i realizacije kvalitetnih projekata. Infrastruktura prostornih podataka i INSPIRE direktiva su okviri nacionalne politike u kreiranju, razmjeni i distribuciji prostornih podataka, a iskazana je neophodnost dovršetka reforme zemljije administracije u skladu s tradicijom, ali i evropskom praksom i vizijom u vidu integralne baze podatka o nekretninama. Istaknuta je zahvalnost donatorima, posebno predstavnicima Kraljevine Švedske i CILAP projekta, ali i daljnja potreba aktivnog partnerskog odnosa s regionalnim, evropskim i drugim međunarodnim agencijama u cilju razmjene iskustava i potpore u izgradnji kvalitetnog sistema evidencija nekretnina.